

LA MÒLTI DI CUMMÀRI ZIRICHÈLTA



Progettu "Li Linghi di Tarranóa - Sas Limbas de Terranoa" - Annualitài 2023 – Finanziatu da la Regioni Saldigna cu' la Legghji 482 di lu 99 e cu' la Legghji Regionali 22 di lu 2018 e sigutu da l'Istitutu Chircas


LA MÒLTI DI CUMMÀRI ZIRICHÈLTA

Cummàri Zirichèlta aia gana d'un óa frissu. Punisi una saltàina illu fócu, l'óciu illa saltàina e l'óa ill'óciu. Ma pói, muèndi e muèndi la coda, si smintichési di l'óciu e andési a punissi a lu sóli.

Lu fócu brusgési l'óciu e l'óciu brusgési la saltàina.

Tuttu chissu fiàcu di brusgiàtu fési accudì li cummàri d'accultu, chi pinsésini chi Cummàri Zirichèlta c'éra falàta illa saltàina.

"Ohi, chi malasòlти, ohi, chi malasòlти!", si punisini a bóci addhulurìti....




Passési chì accultu Cummàri Ghjaddina.

«E coo-coo-coòsa è lu ch'aéti?»

**«Cummàri Ghjaddina, no lu pudéti
immagghjinà! Cummàri Zirichèlta c'è
falàta illa saltàina ed è mòlta».**

**«Coo-coo-coòsa séti dicèndi, cummàri
méa, avvèru séti fendi? Tandu éu pa' lu
dispiacéri mi ni tiru la crista!»**

**E cussì Cummàri Ghjaddina pa' lu
dispiacéri si ni tirési la crista.**



Passési Cummàri 'Acca.

**«Maa-Maa-Maa cos'è lu ch'aéti chici
(cos'è succidèndi)?»**

**«Cummàri 'Acca, chi malasòlti! Cummàri
Ghjaddina si n'à tiratu la crista palchi
Cummàri Zirichèlta c'è falàta illa saltàina
ed è mòlta».**

**«Maa-maa-maaamma méa bèddha, còsa
sòcu intindèndi! Tandu éu pa' lu dispiacéri
mi ni taddhu una titta!»**

**E cussì Cummàri 'Acca pa' lu dispiacéri si
ni taddhési una titta.**



Passési Cumpàri Caddhu.

«Cumpàri Caddhu, chi malasòlti! Cummàri 'Acca si n' à taddhàtu una titta, palchi Cummàri Ghjaddina si n' à tiratu la crista palchi Cummàri Zirichèlta c'è falàta illa saltàina ed è mòlta».

«lih-iih-iih chi còsa suzza chi sòcu intindèndi! Tandu éu pa' lu dispiacéri mi ni taddhu la códa!»

E cussì Cumpàri Caddhu, pa' lu dispiacéri, si ni taddhési la códa.



Passési Cummàri Pécura.

«Cummàri Pécura, aéti sappùtu! Cumpàri Caddhu si n' à taddhàtu la códa palchì Cummàri 'Acca si n' à taddhatu una titta, palchì Cummàri Ghjaddina si n' à tiratu la crista palchì Cummàri Zirichèlta c'è falàta illa saltàina ed è mòlta».

«Bee-bee-beèddhi còsi mi séti dicèndi, cummàri méa! Tandu éu pa' lu dispiacéri mi tundu in tuttu!».

E cussì Cummàri Pécura si tundìsi in tuttu pa' lu dispiacéri.




Passési Cumpàri Bóiu.

«Cumpari Bóiu, eti intésu! Cummàri Pécura s'è tusa in tuttu palchi Cumpàri Caddhu si n'à taddhàtu la còda, palchi Cummàri 'Acca si n'à taddhatu una titta, palchi Cummàri Ghjaddina si n'à tiratu la crista, palchi Cummàri Zirichèlta c'è falàta illa saltàina ed è mòlta».

«Moo-moo-moo mòlta è mischina! Tandu éu pa' lu dispiacéri mi scòrru!».

E cussì Cumpàri Bóiu si scurrési pa' lu dispiacéri.



Passési Cumpàri Asinu.

«Cumpàri Asinu, chi malasòlti! Cumpàri Bóiu s'è scurràtu, palchì Cummàri Pécura s'ètusa in tuttu palchì Cumpàri Caddhu si n'à taddhàtu la códa, palchì Cummàri 'Acca si n'à taddhatu una titta, palchì Cummàri Ghjaddina si n'à tiratu la crista, palchì Cummàri Zirichèlta c'è falàta illa saltàina ed è mòlta».

«oh-ih-oh-ih chi lastìma! Tandu éu pa' lu dispiacéri mi ni bócu un òcchji!».

E cussì Cumpàri Asinu si ni buchési un òcchji pa' lu dispiacéri.




A ultiméra turrési Cummàri Zirichèlta.

«Cummàri Zirichèlta, chi malasòlti!»

«E cos'è cumbinàtu?», disi iddha.

«Cumpàri Asinu si n' à bucàtu un òcchji (s' è incicùtu), palchì Cumpàri Bóiu s' è scurràtu, palchì Cummàri Pécura s' è tusa in tuttu, palchì Cumpàri Caddhu si n' à taddhàtu la códa, palchì Cummàri 'Acca si n' à taddhatu una titta, palchì Cummàri Ghjaddina si n' à tiratu la crista, palchì cridia chi Cummàri Zirichèlta c' è falàta illa saltàina ed è mólta».



«Oi chi malasòlti, cummàri méa! Chi malasòlti! Tandu éu pa' lu dispiacéri mi ci lampu illa saltàina!!».

E tandu Cummàri Zirichèlta ci si lampési avvèru illa saltàina pa' lu dispiacéri.

Cussì tutti abà érani adduluriti pa' la mòlti di Cummàri Zirichèlta e li cummàri d'accùltu li fésini avvèru un bèddhu funeràli!

